



Quatter damas han levgià ad Oscar Knapp il cumià: chanceliera federala Corina Casanova, las cusseglieras federalas Eveline Widmer-Schumpf e Doris Leuthard e la dunna Elisabeth Knapp-Preisig sco era Roger de Weck, directur general da la SRG SSR e Mariano Tschuor, directur RTR Radiotelevision Svizra Rumantscha.

MAD

Oscar Knapp prenda cumià da Berna

■ (rtr) Suent in'activitad da 35 onns en servetsch da la confederaziun prenda Oscar Knapp cumià da Berna la fin d'avust 2013 cura ch'el cumplenescha 65 onns. Cun ina festa ha el fatg quai quest'emna en la chapitala svizra, e «tout Berne» era preschent. *Oscar Knapp* prenda cumià da sias incumbensas tar la confederaziun per s'engaschar ussa cumplainmain per ses mandat tar la SRG ssR, sco president da la societad regionala SRG ssR Svizra Rumantscha e sco commember dal cussegl d'administraziun naziunal da la SRG ssR.

Avant 35 onns è Oscar Knapp, oriund da Scuol, entrà en servetsch da la confederaziun suenter ch'el ha gi terminà ses studis academics a Son Gagl. El ha lavurà en ils departaments da l'economia, da l'exteriur e da las finanzas. Ses posts da lavur èn stads a Berna, Paris, Brasilia, Washington ed a Vienna. En dus pajais ha el represchentà la Sviz-

ra sco ambasadur: en la Brasilia ed en l'Austria.

Uss, a la fin da sia carriera briglianta, ha el lavurà en il nov secretariat statal per dumondas da finanzas e dal martgà. Sco quai ch'el di è quai stà ina da las pli fascinantas lavurs da sia vita, quai er en vista a las differentas sfidas actualas per la piazza da finanzas svizra.

El e sia consorta *Elisabetta* han envidà amis e collegas da lavur ad ina festina da cumià en las localitads da la Grande Societè a Berna. Bleras e blers èn stads preschents, uschia las cusseglieras federalas *Eveline Widmer-Schlumpf* e *Doris Leuthard*, la chanceliera federala *Corina Casanova*, il secretari da stadi *Michael Ambühl*, l'antierur cusseglier federal *Samuel Schmid*, divers parlamentararis, diplomats, collavuratur da l'administraziun federala e da l'economia ed ina gronda retscha da Rumantschas e Rumantschs engaschads tar la confederaziun e tar la SRG

ssR. Lezza è stada represchentada entras il president *Raymond Loretan* ed il directur general *Roger de Weck* e pliras collavuraturas e plirs collavuratur da RTR e da la direcziun generala.

En moda e maniera simpatica e fitg persunala ha Eveline Widmer-Schlumpf renconuschì la lavur dad Oscar Knapp ed onurà el cun intgins plects en vallader, quai ch'ella fetschia excepziunalmain per far in plaschair ad Oscar Knapp, essend ella fermamain per il rumantsch grischun en la vita publica. Michael Ambühl, il secretari da stadi, ha laschà passar revista intginas staziuns da lavur comunablas ed ha accentuà la gronda professiunalitad dad Oscar Knapp sco ambasadur brigliant.

Ussa metta Oscar Knapp sia forza da lavur e sia enorma rait sociala cumplainmain en servetsch da la SRG ssR ed uschia a moda exprimida per RTR Radiotelevision Svizra Rumantscha.